



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**38. Kalenderwoche – ab 19. September 2010**

## Sarraziehn un de Wundorlambe

Kenn Sie dähn aldn Aladiehn? Dähn mid dor Wundorlambe? Das is so e Märschn aus Dausend un zwee Näsche odor so. Dähr Aladiehn hadde ja in seinor Wundorlambe een Geisd drinne un dähn Geisd had dähr mundor gemachd. Un dann had sich dor Geisd selbschdändisch gemachd. Nascha, un e bißl isses ja beim Sarraziehn ooch so - dähr had een Geisd mundor gemachd, dähr irschendwie geschlummord had. Allordings nisch direggd in eenor Wundorlambe, sondorn so in dor Volksseele! Un im weidoren Sinne kammor de Volksseele eischendlich ooch als Wundorlambe bezeichnen. Mor weeiß nie genau, was rauskomm dud!

Jedzde also, weil dähr Sarraziehn e bißl Radau gemachd had - vonweeschn Migrandn un so, die immor mähr wern in Deuschland... un daderzu e bißl doof sin... un ooch grimminell... - da is in dor Wundorlambe dähr alde Geisd mundor gewordn - dähr alde Geisd, wo mor schon dachde, dass dähr längsd dod is - dähr Geisd, dähr wo sachn dud, dass irschendwelsche fremdschdämmischn Eindringlinge eene Bedrohung fiehr unsorn Wohlschdand sein dädn!

Un alle dun nu zum Sarraziehn haldn - de BILD-Zeidung, dor Schdammdisch in dor "Deuschn Eische", dor Bund schwäbischer Jungfraun un ooch de Mährheid im Schräborvoren. Endlich hädde ma eenor gesachd, was annre bloß denkn dädn! De Migrandn sinn eene Gefahr. Es gab eene Zeid, da warns de Judn un annre Andersche.

De Migrandn wern uns in den Abgrund schderzn. Das sin die, die annersch aussähn dun wie mir. Die nisch an dähn liehm Godd gloom, die Gobbieschor drachn dun... un wochnlang nischd fressn dun... un ihre Deschdor zwangsvorheiradn... - solsche sin das! Sähr fremdardsich! Sähr gefährlich!

Un dazu noch arbeitsscheu! Lähm von Harz viere! Die sin schuld, wenns uns nisch alln so gud gehn dud wie Herrn Aggormann odor Herrn Aldi! Nee, nisch de Bankn sin gefährlich, odor de Muldigonzerne, die de Weld rundsrum auszudschn dun... de Ölgonzerne, die de Riesngewinne machn... nisch de Megareischn, die alleene dursch de Zinsn mähr Geld vordiehn, als wie de Wirtschafd in Sachsn Umsatz machn dud... - nee, die sin nisch schuld an irschendwas. Die sin nisch gefährlich! Die Anderschn sin gefährlich, die nisch so sin als wie mir!

Das is ungefähr so dähr alde Geisd, dähn dor Sarrazieln aus dor Wundorlambe rausgeschdängord had. Wahrscheinlich dud dähr ooch selbor e bißl so denkn. Abor das muss gahr nisch sein. Es dud ja reischn, dass dähr dähn Geisd offgeweggd had. Dass mor ne sähn kann! Solange dor Geisd schdille un heimlich in dor Lambe hoggn dud, kann keenor was dageeschn machn - abor jedzde, woor draußn is... - da missde mor doch... villeischd midm Gnibbl?... odor mid dor Flieschngladsche... nee, wie mor so een aldn doofn Geisd besieschn kann, das weeiß isch jedzde ooch nisch. Wahrscheinlich wird dähr sisch demnäschs widdor in sein Vorschdegg zuriggzieh'n un widdor friedlich schlummorn. Bis widdor ma eenor komm dud...

**Eduard Sachsenmeyer**